



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Juñu 2010

Edisiaun : 22 Juñu 2010

Inaugurasaun rezidénsia ba Prokurador no Oficial Justisa iha Distritu Oe-Cusse

Iha loron 18 Juñu 2010 Ministériu Públiku (MP) hala'o serimonia inaugurasaun ba rezidénsia prokurador no oficial justisa iha jurisdisaun Tribunal Oe-cusse. Seremonia inaugurasaun ne'e hetan partisipasaun husi Prezidente da Republika Sr. Dr Jose Ramós Horta, Prezidente Tribunal Rekursu Sr. Dr Claudio Ximenes, Prokuradoria Geral da Republika (PGR), Sra. Dra. Ana Pessoa, reprezentente espesial UNMIT Dra. Ameraah Haaq, Komandante Geral F-FDTL, Major Jeneral Taur Matan Ruak, Komandante Naval Pedro Klamar Fuik, Membreu Parlamentu Nasionál, Sra. Fernanda Borges, Bispu Dioseze Dili Dom Alberto Ricardo da Silva, doadores sira, Konsuladu Indonesia nian iha Oe-cusse, no ONG internasionál no nasionál.

Prezidente da Republika (PR), iha nia diskursu badak, nia louva PGR, Dra. Ana Pessoa nia komitmentu no planu atu realiza projetu hari'i rezidénsia ba funsionariu Ministériu Públiku iha area Judisiariu tomak. PR mós louva emprizariu Timor oan ne'ebé maka Ministériu Públiku fo konfiansa kaer projetu ida ne'e tanbá bele gasta orsamentu ne'ebé maka naton (\$178.000) maibé halo projetu ho kualidade diak.

Nune'é mós iha parte seluk, Dra. Ana Pessoa rasik nu'udar Prokurador Jeral da Republika no nu'udar superior ba instituisaun Ministériu Públiku iha ninia diskursu haktuir katak facilidade sira ne'e atu fasilita Ministériu Públiku nia funsionariu sira atu bele hala'o sira nia kna'ar ho diak hodi responde nesesidade povu no sosiedade iha area justisa nian. Realizasaun hari'i rezidénsia sira ne'e nu'udar mós resposta husi sosiedade sivil sira nia preokupasaun ne'ebé durante ne'e nota katak falta facilidade ne'ebé halo servisu iha area judisiariu nian hetan dezafius no empedementus barak. Nune'é ho facilidade sira ne'e, bele iha ona mudansa ba servisu judisiariu liu-liu atendentu ba povu nia nesesidade iha seitór Justisa.

Direitór ezeutivu JSMP, Luis de Oliveira Sampaio haktuir ho inaugurasaun ne'e nu'udar pasu positivu intermus iha aspetu infraestrutura nian hodi fasilita Majistradus Ministériu Públiku hodi ezerse sira nia funsaun no papel ho efetivu liu. Esforsu sira ne'e hotu atu hadia no hametin diak liu tan kualidade servisu Ministériu Públiku nian.

JSMP hanoin katak estabeselementu rezidénsia parmanente ba majistradu sira nu'udar meuz atu hatan ba preokupasaun sira ne'ebé durante ne'e mosu katak la iha fatin parmanente ba majistradus sira nu'udar fatór impedimentu ida ba sira atu hela metin iha kada jurisdisaun ne'ebé sira designadu ba.

Maske nune'é, JSMP kontinua rekomenda ba estadu ka instituisaun kompetente atu fornese mos meuz no kondisaun hanesan ba autór tribunal sira seluk, defensoria publiku no ofisial justisa sira seluk.

Atu hetan informasaun ne'ebé kle'an liu favor kontaktu:

Luis de Oliveira Sampaio

Direitur Ezekutivu JSMP

Email: luis@jsmp.minihub.org

Landline: 3323883